

宮
闈
典

宮闈典第一百十卷

外戚部列傳八

宋 趙裔 蕭卓

按宋書孝穆趙皇后傳后父裔字彥胄平原太守永初二年有司奏曰大孝之德盛於榮親一人有慶光被萬國是以靈文寵於西京壽張顯於隆漢故平原太守趙裔故洮陽令蕭卓並外屬尊戚不逮休寵臣等仰述聖思遠稽舊章並可追贈光祿大夫加金章紫綬裔命婦孫可豫章郡建昌縣君卓命婦趙可吳郡壽昌縣君孫氏東莞人也其年又詔曰推恩之禮在情所同故內樹宗子外崇后屬爰自漢魏咸遵斯典外祖趙光祿蕭光祿名器雖隆茅土未建並宜追封開國縣侯食邑五百戶於是追封裔臨賀縣侯裔長子宣之仕至江乘令早卒無子以弟孫襲之繼宣之紹封襲之卒子祖憐嗣齊受禪國除宣之弟倫之自有傳 按孝懿蕭皇后傳后父卓字子略洮陽令與趙裔俱贈金紫光祿大夫又追封封陽縣侯妻下邳趙氏封吳郡壽昌縣君卓子源之襲爵源之見子思話傳

趙倫之

按宋書本傳倫之字幼成下邳僮人也孝穆皇后之弟幼孤貧事母以孝稱武帝起兵以軍功封閭中縣五等侯累遷雍州刺史武帝北伐倫之遣順陽太守傅弘之扶風太守沈田子出嶢柳大破姚泓於藍田及武帝受命以佐命功封霄城縣侯安北將軍鎮襄陽少帝卽位徵拜護軍元嘉三年拜鎮軍將軍尋遷左光祿大夫領軍將軍倫之雖外戚貴盛而以儉素自處性野拙人性世務多所不解久居方伯頗覺富盛入爲護軍資力不稱以爲見貶光祿大夫范泰好戲謂曰司徒公缺必用汝老奴我不言汝資地所任要是外戚高秩次第所至耳倫之大喜每載酒餽詣泰五年卒伯符嗣

趙伯符

按宋書趙倫之傳倫之子伯符字潤遠少好弓馬倫之在襄陽伯符爲竟陵太守時竟陵蠻屢爲寇伯符征討悉破之由是有將帥之稱後爲盩厔將軍總領義徒以居宮城北每有火起及賊盜輒身貫甲冑助郡縣赴討武帝甚嘉之文帝卽位累遷徐兗二州刺史爲政苛暴吏人畏之若豺虎然而寇盜遠竄無敢犯境元嘉十八年徵爲領軍將軍先是外監不隸領軍宜相統攝者自有別詔至此始統領焉二十一年轉豫州刺史明年爲護軍將軍復爲丹陽尹在郡嚴酷吏人苦之或至委叛被

錄赴水而死典筆更取筆不如意鞭五十

臧儻

按宋書后妃傳武敬臧皇后東莞人也祖汪字山甫尚書郎父儻字宣父郡功曹宋初追贈儻金紫光祿大夫妻高密叔孫氏封永陵平鄉君

臧燾

按宋書本傳燾字德仁東莞莒人武敬皇后兄也少好學善三禮貧約自立操行爲鄉里所稱晉孝武帝太元中衛將軍謝安始立國學徐袞二州刺史謝元舉燾爲助教孝武帝追崇庶祖母宣太后議者或謂宜配食中宗燾議曰陽秋之義母以子貴故仲子成風咸稱夫人經云考仲子之宮若配食惠廟則宮無緣別築前漢孝文孝昭太后並繫子爲號祭于寢園不配於高祖孝武之廟後漢和帝之母曰恭懷皇后安帝祖母曰恭愍皇后雖不繫子爲號亦祭於陵寢不配章安二帝此則二漢雖有太皇太后之異至於並不配食義同陽秋唯光武追廢呂后故以薄后配高祖廟又衛后旣廢霍光追尊李夫人爲皇后配孝武廟此非母以子貴之例直以高武二廟無配故耳夫漢立寢於陵

自是晉制所異謂宜遠準陽秋考宮之義近摹二漢不配之典尊號旣正則罔極之情申別建寢廟則嚴禩之義顯繫子爲稱兼明母貴之所由一舉而允三義固哲王之高致也議者從之頃之去官以母老家貧與弟熹俱棄人事躬耕自業約己養親者十餘載父母喪亡居喪六年以毀瘠著稱服闋除臨沂令義旗建爲太學博士參右將軍何無忌軍事隨府轉鎮南將軍高祖鎮京口與熹書曰頃學尙廢弛後進頽業衡門之內清風輟響良由戎車屢警禮樂中息浮夫近志情與事染豈可不敷崇墳籍敦厲風尙此境人士子姪如林明發搜訪想聞令軌然荆玉含寶要俟開塋幽蘭懷馨事資扇發獨習寡悟義著周典令經師不遠而赴業無聞非唯志學者鮮或是勸誘未至耶想復弘之參高祖中軍軍事入補尙書度支郎改掌祠部襲封高陵侯時太廟鴟尾災熹謂著作郎徐廣曰昔孔子在齊聞魯廟災曰必桓僖也今征西京兆四府君宜在毀落而猶列廟饗此其徵乎乃上議曰臣聞國之大事在祀與戎將營宮室宗廟爲首古先哲王莫不致肅恭之誠心盡崇嚴乎祖考然後能流淳化于四海通幽感于神明固宜詳廢興于古典循情禮以求中者也禮天子七廟三昭三穆與太祖而七自考廟以至祖考五廟皆月祭之遠廟爲祧有二祧享嘗乃止去祧爲壇去壇爲墀有

禱然後祭之此宗廟之次親疎之序也鄭元以爲祧者文王武王之廟王肅以爲五世六世之祖尋去祧之言則祧非文武之廟矣周之祖宗何云去祧爲壇乎明遠廟爲祧者無服之祖也又遠廟則有享嘗之禮去祧則有壇墠之殊明世遠者其義彌疎也若祧是文武之廟宜同月祭于太祖雖推后稷以配天由功德之所始非尊崇之義每有差降也又禮有以多貴者故傳稱德厚者流光德薄者流卑又云自上以下降殺以兩禮也此則尊卑等級之典上下殊異之文而云天子諸侯俱祭五廟何哉又王祭嫡殤下及來孫而上祀之禮不過高祖推隆恩于下流替誠敬于尊屬亦非聖人制禮之意也是以泰始建廟從王氏議以禮父爲士子爲天子諸侯祭以天子諸侯其尸服以士服故上及征西以備六世之數宣皇雖爲太祖尙在子孫之位至于敬祭之日未申東向之禮所謂子雖齊聖不先父食者矣今京兆以上旣遷太祖始得居正議者以昭穆未足欲屈太祖于卑坐臣以爲非禮典之旨所與太祖而七自是昭穆旣足太祖在六世之外非謂須滿七廟乃得居太祖也議者又以四府君神主宜永同于殷祫臣又以爲不然傳所謂毀廟之主陳乎太祖謂太祖以下先君之主也故白虎通云祫祫祭遷廟者以其繼君之體持其統而不絕也豈如四府君在太祖之前非繼

統之主無靈命之瑞非王業之基昔以世近而及今則情禮已遠而當長享殷祫承虛太祖之位求之禮籍未見其可昔永和之初大議斯禮于時虞喜范宣並以淵儒碩學咸謂四府君神主無緣永存于百世或欲瘞之兩階或欲藏之石室或欲爲之改築雖所秉小異而大歸是同若宣皇旣居羣廟之上而四主禘祫不已則大晉殷祭長無太祖之位矣夫理貴有中不必過厚禮與世遷豈可順而不斷故臣子之情雖篤而靈厲之謚彌彰追遠之懷雖切而遷毀之禮爲用豈不有心于加厚顧禮制不可踰爾石室則藏于廟北改築則未知所處虞主所以依神神移則有瘞埋之禮四主若享祀宜廢亦神之所不依也准傍事例宜同虞主之瘞埋然經典難詳羣言紛錯非臣卑淺所能折中時學者多從議竟未施行遷通直郎高祖鎮軍車騎中軍太尉諮議參軍高祖北伐關洛大司馬琅邪王同行除大司馬從事中郎總留府事義熙十四年除侍中元熙元年以脚疾去職高祖受命徵拜太常雖外戚貴顯而彌自冲約茅屋蔬餐不改其舊所得奉祿與親戚共之永初三年致仕拜光祿大夫加金章紫綬其年卒時年七十少帝追贈左光祿大夫加散騎常侍長子邃護軍司馬宜都太守少子綽太子中舍人新安太守邃長子湛之尙書都官郎烏程令湛之弟凝之學涉有當世

才具與司空徐湛之爲異常之交年少時與北地傅僧祐俱以通家子始爲太祖所引見時上與何
尙之論鑄錢事凝之便干其語上因回與論之僧祐引凝之衣令止凝之大言謂僧祐曰明主難再
遇便應正盡所懷上與往復十餘反凝之詞韻詮序兼有理證上甚賞焉歷隨王誕後軍記室錄事
欲以爲青州其事不果遷尙書右丞以徐湛之黨爲元凶所殺子黃尙書主客郎徐羨之征西功曹
爲攸之盡節事在攸之傳凝之弟潭之亦有美譽太宗世歷尙書吏部郎御史中丞後廢帝元徽中
爲左民尙書卒官潭之弟澄之太子左積弩將軍元嘉二十七年領軍于盱眙爲北魏所破見殺追
贈通直郎綽子煥順帝昇明中爲武昌太守沈攸之攻郢城煥棄郡赴之攸之敗伏誅傅僧祐祖父
弘仁高祖外弟也以中表歷顯官征南將軍南譙太守太常卿子邵員外散騎侍郎妻熹女也生僧
祐有吏才再爲山陰令甚有能名末世令長莫及亦以徐湛之黨爲元凶所殺

臧熹

按宋書臧質傳質字含文東莞莒人父熹字義和武敬皇后弟也與兄燾並好經籍隆安初兵革屢
起熹乃習騎射志在立功嘗至溧陽溧陽令阮崇與熹共獵值虎突圍獵徒並奔散熹直前射之應

弦而倒高祖入京城熹族子穆斬桓修進至京邑桓元奔走高祖使熹入宮收圖書器物封閉府庫有金飾樂器高祖問熹卿得無欲此乎熹正色曰皇上幽逼播越非所將軍首建大義劬勞王家雖復不肖無情于樂高祖笑曰聊以戲卿爾行參高祖鎮軍事員外散騎侍郎重參鎮軍軍事領東海太守以義功封始興縣五等侯又參高祖車騎中軍軍事高祖將征廣固議者多不同熹從容言曰公若凌威北境拯其塗炭寧一六合未爲無期高祖曰卿言是也及行熹求從不許以爲建威將軍臨海太守郡經兵寇百不存一熹綏緝綱紀招聚流散歸之者千餘家孫季高海道襲廣州路由臨海熹資給發遣得以無乏徵拜散騎常侍母憂去職頃之討劉毅起爲寧朔將軍從征事平高祖遣朱齡石統平大衆伐蜀命熹奇兵出中水以本號領建平巴東二郡太守蜀主譙縱遣大將譙撫之萬餘人屯牛脾又遣譙小苟重兵塞打鼻熹至牛脾撫之戰敗退走追斬之小苟聞撫之死卽便奔散成都旣平熹遇疾義熙九年卒于蜀郡牛脾縣時年三十九追贈光祿勳

袁湛

按宋書本傳湛字士深陳郡陽夏人也祖耽仕晉歷陽太守父質瑯琊內史並知名湛少爲從外祖

謝安所知以其兄子元之女妻之初爲衛軍行參軍員外散騎通直正員郎中軍功曹桓元太尉奉軍事入爲中書黃門侍郎出補桓修撫軍長史義旗建高祖以爲鎮軍諮議參軍明年轉尙書吏部郎司徒左長史侍中以從征功封晉寧縣五等男出爲高祖太尉長史遷左民尙書徙掌吏部出爲吳興太守秩中二千石蒞政和理爲吏民所稱入補中書令又出爲吳國內史秩中二千石義熙十二年轉尙書右僕射本州大中正時高祖北伐湛兼太尉與兼司空散騎常侍尙書范泰奉九命禮物拜授高祖高祖沖讓湛等隨軍至洛陽住柏谷塢泰議受使未畢不拜晉帝陵湛獨至五陵致敬時人美之初陳郡謝重王胡之外孫於諸舅禮敬多闕重子綯湛之甥也嘗于公座陵湛湛正色謂曰汝便是兩世無渭陽之情綯有愧色十四年卒官時年四十追贈左光祿大夫加散騎常侍太祖卽位以后父追贈侍中以左光祿大夫開府儀同三司諡曰敬公世祖大明三年幸藉田行經湛墓下詔曰故侍中左光祿大夫開府儀同三司晉寧敬公外氏尊戚素風簡正歲紀稍積墳塋浸遠朕近巡覽千畝遙瞻松隧緬惟徽塵咸慕增結可遣使祭少申永懷又增守墓五戶子淳淳子桓卒按后妃傳大明五年世祖詔曰昔漢道旣靈博平輝絕魏國方安嘉憲啟策皆因心所弘酌典沿誥

亡外祖親王夫人柔德淑範光啟坤載屬內位闕正攝饋閨庭儀被芳闈聞宣戚里永言感遠思追榮秩宜式傍鴻則敬登徽序乃追贈豫章郡新淦縣平樂鄉君后之所生母也又詔趙蕭臧光祿袁敬公平樂郡君墓先未給塋戶加世數已遠裔嗣衰陵外戚尊屬不宜使墳塋蕪穢可各給蠻戶三以供灑掃后父湛之自有傳

路興之

按宋書文帝路淑媛傳淑媛諱惠男丹陽建康人也生孝武帝拜爲淑媛上卽位奉尊號曰皇太后孝建二年追贈太后父興之散騎常侍妻徐氏餘杭縣廣昌鄉君大明四年太后弟子撫軍參軍瓊之上表曰先臣故懷安令道慶賦命乖辰自違明世敢緣衛戍請名之典特乞雲雨微垂灑潤詔付門下有司承旨奏贈給事中瓊之及弟休之茂之並超顯職太后頗豫政事賜與瓊之等財物家累千金居處服器與帝子相侔瓊之宅與太常王僧達並門嘗盛車服衛從造僧達僧達不爲之禮瓊之以訴太后太后大怒告上曰我尙在而人皆陵我家死後乞食矣欲罪僧達上曰瓊之年少自不宜輕造詣王僧達貴公子豈可以此事加罪泰始四年瓊之爲衡陽內史先后卒廢帝景和中以休

之爲黃門侍郎茂之左軍將軍並封開國縣侯邑千戶又追贈興之侍中金紫光祿大夫諡曰孝侯道慶散騎常侍光祿大夫開府儀同三司諡曰敬侯立道慶女爲皇后以休之爲侍中茂之黃門郎太宗廢幼主欲說太后之心乃下令書曰太皇太后早垂愛遇沿情卽事同于天屬前車騎咨議參軍路休之前丹陽丞路茂之崇憲密戚早延榮貴並懷所勳宜殊恆飾休之可黃門侍郎領步兵校尉茂之可中書侍郎太宗未卽位故稱令書茂之又遷司徒從事中郎休之桂陽王休範鎮北咨議參軍太宗殺世祖諸子因此陷休之等宥其諸子

王偃

按宋書孝武文穆王皇后傳后父偃字子游晉丞相導元孫尙嘏之子也母晉孝武帝女鄱陽公主宋受禪封永成君偃尙高祖第二女吳興長公主諱榮男少歷顯官黃門侍郎祕書監侍中元嘉末爲散騎常侍右衛將軍世祖卽位以后父授金紫光祿大夫領義陽王師常侍如故遷右光祿大夫常侍王師如故偃謙虛恭謹不以世事關懷孝建二年卒時年五十四追贈開府儀同三司本官如故諡曰恭公長子藻位至東陽太守尙太祖第六女臨川長公主藻弟懋昇明末貴達懋弟攸太宰

從事中郎早卒追贈黃門侍郎弟臻昇明末顯宦

王景文

按宋書本傳景文琅邪臨沂人也名與明帝諱同祖穆臨海太守伯父智少簡貴有高名高祖甚重之常云見王智使人思仲祖與劉穆之謀討劉毅而智在焉它日穆之白高祖曰伐國重事也公云何乃使王智知高祖笑曰此人高簡豈聞此輩論議其見知如此爲太尉咨議參軍從征長安留爲桂陽公義真安西將軍司馬天水太守還爲宋國五兵尚書晉陵太守加秩中二千石封建陵縣五等子追贈太常父僧朗亦以謹實見知元嘉中爲侍中勤于朝直未嘗違情太祖嘉之以爲湘州刺史世祖大明末爲尚書左僕射太宗初以后父爲特進左光祿大夫又進開府儀同三司固讓乃加侍中特進尋薨追贈開府諡曰元公景文出繼智幼爲從叔球所知美風姿好言理少與陳郡謝莊齊名太祖甚相欽重故爲太宗娶景文妹而以景文名與太宗同高祖第五女新安公主先適太原王景深離絕當以適景文固辭以疾故不成婚起家太子太傅主簿轉太子舍人襲爵建陵子出爲江夏王義恭始興王濬征北後軍二府主簿武陵王文學世祖撫軍記室參軍南廣平太守轉咨議

參軍仍度安北鎮軍府出爲宣城太守元凶弒立以爲黃門侍郎未及就世祖入討景文遣間使歸款以父在都邑不獲致身及事平頗見嫌責猶以舊恩除南平王鑠司空長史不拜出爲東陽太守入爲御史中丞祕書監領越騎校尉不拜遷司徒左長史上以散騎常侍舊與侍中俱掌獻替欲高其選以景文及會稽孔顗俱南北之望並以補之尋復爲左長史坐姉墓開不臨赴免官大明二年復爲祕書監太子右御率侍中五年出爲安陸王子綏冠軍長史輔國將軍江夏內史行郢州事又徵爲侍中領射聲校尉右衛將軍加給事中太子中庶子右衛如故坐與奉朝請毛法因蒲戲得錢百二十萬白兵領職尋復爲侍中領中庶子未拜前廢帝嗣位徙祕書監侍中如故以父老自解出爲江夏王義恭太宰長史輔國將軍南平太守永光初爲吏部尙書景和元年遷右僕射太宗卽位加領左衛將軍時六軍戒嚴景文仗士三十人入六門諸將咸云平殄小賊易于拾遺景文曰敵固無小蜂蠆有毒何可輕乎諸軍當臨事而懼好謀而成先爲不可勝乃制勝之術耳尋遷丹陽尹僕射如故遭父憂起爲冠軍將軍尙書左僕射丹陽尹固辭僕射改授散騎常侍中書令中軍將軍尹如故又辭不拜仍出爲使持節散騎常侍都督江州郢州之西陽豫州之新蔡晉熙三郡諸軍事安

南將軍江州刺史讓常侍服闋乃受太宗剪除暴主又平四方欲引朝望以佐大業乃下詔曰夫良圖宣國賞崇彝命殊績顯朝策勤王府安南將軍江州刺史景文風度淹粹理懷清暢體兼望實誠備夷阻寶曆方啟密贊義機妖徒干紀預毗廟略宜登茅社永傳厥祚朕澄氛靈樞實資多士疏爵疇庸實膺徽列尙書右僕射領衛尉興宗識懷詳正思局通敏吏部尙書領太子左衛率淵器情閑茂風業韶遠並謀參軍政績亮時艱拓宇開邑實允勲典景文可封江安縣侯食邑八百戶興宗可始昌縣伯淵可南城縣伯食邑五百戶景文固讓不許乃受五百戶進號鎮南將軍尋給鼓吹一部後以江州當徙鎮南昌領豫章太守餘如故州不果遷頃之徵爲尙書左僕射領吏部揚州刺史加太子詹事常侍如故不願還朝求爲湘州刺史不許時又謂景文在江州不能潔己景文與上幸臣王道龍書曰吾雖寡于行己庶不負心旣愧殊效誓不上欺明主竊聞有爲其貝錦者云營生乃至巨萬素無此能一旦忽致異術必非平理唯乞平心精檢若此言不虛便宜肆諸市朝以正風俗脫其妄作當賜思罔昧之由吾踰忝轉深足以致謗念此驚懼何能自測區區所懷不願望風容貸吾自了不作偷猶如不作賊故以密白想爲申啟景文屢辭內授上手詔譬之曰尙書左僕射卿已經

此任東宮詹事用人雖美職次正可比中書令耳庶姓作揚州徐干木王休元殷鐵並處之不辭卿
清令才望何愧休元毗贊中興豈謝干木綢繆相與何後殷鐵耶司徒以宰相不應帶神州遠遵先
旨京口鄉基義重密邇畿內又不得不用驃騎陝西任要由來用宗室驃騎旣去巴陵理應居之中
流雖曰閑地控帶三江通接荆郢經塗之要由來有重鎮如此則揚州自成闕刺史卿若有辭更不
知誰應處之此選大備與公卿疇懷非聊爾也固辭詹事徙領中書令常侍僕射揚州如故又進中
書監領太子太傅常侍揚州如故景文固辭太傅上遣新除尙書右僕射褚淵宣旨以古來比例六
事詰難之不得已乃受拜時太子及諸皇子並小上稍爲身後之計諸將帥吳喜壽寂之之徒慮其
不能奉幼主並殺之而景文外戚貴盛張永累經軍旅又疑其將來難信乃自爲謠言曰一士不可
親弓長射殺人一士王字弓長張字也景文彌懼乃自陳求解揚州曰臣凡猥下劣方圜無算特逢
聖私頻叨不次乘非其任理宜覆折雖加恭謹無補橫至夙夜焦戰無地容處六月中得臣外甥女
殷恒妻蔡疏欲令其兒啟聞乞祿求臣署入云凡外人通啟先經臣署于時驚怖卽欲封疏上呈更
思此家落漠庶非通謗且廣聽察幸無復所聞比日忽得兗州都送迎西曹解季遜板云是臣屬旣

不識此人卽問郗顯方知虛託此十七日晚得征南參軍事謝儼口信云臣使人略奪其婢臣遣李武之問儼元由答云使人謬誤誤之與實雖所不知聞此之日唯有憂駭臣之所知便有此三變臣所不覺尤不可思若守爵散輩寧當招此誠由闇拙非復可防自竊州任倏已七月無德而祿其殃將至且傳職清峻亢禮儲極以臣凡走豈可暫安荷恩懼罪不敢執固焦魂褫氣憂迫失常況臣髮醜人羣病絕力効穢朝黜列顧無與等獨息易駭慙懼難持伏願薄回矜愍全臣身計大夫之俸足以自周久懷欣羨未敢干請仰希慈宥照臣欵誠上詔答曰去五月中吾病始差未堪勞役使卿等看選牒署竟請勅施行此非密事外問不容都不聞然傳事好訛由來常患殷恒妻匹婦耳閭閻之內傳聞事復作一兩倍落漠兼謂卿是親故希卿署不必云選事獨關卿也恒妻雖是傳聞之僻大都非可駭異且舉元薦凱咸由疇諮可謂唐堯不明下干其政邪悠悠好詐貴人及在事者屬卿偶不悉耳多是其周旋門生輩作其屬託貴人及在事者永無由知非徒止于京師乃至州郡縣中或有詐作書疏灼然有文迹者諸舍人右丞輩及親近驅使人慮有作其名載禁物求停檢校疆賣猥物與官仍求交直或屬人求乞州郡資禮希蠲呼召及鹵發船車並啟班下在所有卽駐錄但卿貴